



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Australia nung longkak aiteri Parliament House tejenba nung mi senloktsü

Congress MP Abdul-i CM Sarma anema ken o benok



VOL. XIX NO. 80 (ADOK 80) DIMAPUR

ROGONÜ (FRIDAY) LUCHII (DECEMBER) 31, 2021

₹ 5.00

AFSPA atsülangba ya mezüngmeshi ka lir: NPF

Dimapur, Luchii/Dec. 30 (TYO): Armed Forces (Special Powers) Act, 1958 (No. 28 of 1958) indang Section 3 nung agüja aliba tashi amshia Nagaland state nung ano maneni December 30, 2021 nü nungi tenzüka ita trok atema Disturbed Area Act atsülangba, ta Ministry of Home Affairs, Government of India ajanga sangdongba atema aoksar aser süngmanger, ta Naga People's Front indang sangdong ka ajanga ashi.

Iba Act atsülangba ya December 23 nü Union Home Minister Amit Shah-i Nagaland Chief Minister Neiphiu Rio aser Assam Chief Minister Himanta Biswa Sarma, Deputy CM Nagaland, Y. Patton aser NPF Legislature nung lenir T.R Zeliang nungertem den senden ka amenba sülen ataloker, kong Nagaland nungi Armed Forces (Special Powers) Act agientsü asoshi asadangsü atema Centre-i committee ka tenteta liasü, ta ashi.

Iba ama mera agiba ya yirur alidak ano tali mezüngmeshiba ka lir, ta NPF sangdong ajanga ashi.

Iba Act atsülangshiba ya Central sorkari state tilatem, talisa North-East India mezüngshiba yimya ka amai sayur. AFSPA (1958) onük jembitsü atema December 20, 2021 nü Nagaland Legislative Assembly anogo ka temeja senden mena liasü aser House nung züngsem ajungai iba Act ya agientsü asoshi takangba agütsüsü pangjema liasü.

December 23 senden amenba sülen Nagaland Chief Minister Neiphiu Rio, Deputy CM Y. Patton aser NPF Legislature lenir T.R Zeliang nungertem lungjemer osangbener senden ka nung jembiba mapang Union Home Minister Amit Shah-i iba ken o süoki ia agizükba aser nüburtemi ola adokba nung tajunglen agi langzükba asoshi pelaba lemsatepa liasü.

COVID-19 Nagaland: Cases tasen 3 aser taneptsü angur 4 liasü

Kohima, Luchii/Dec. 30 (TYO): Brehostibarnü Nagaland nung COVID-19 tashidak agi meneper nisung tasen asem liasü aser kasa tashidak nungi taneptsü angur pezü liasü. State nung iba tashidak agi meneper ajak agi nisung 32,191 alitsü.

Taneptsü angur aser cases tasen ajunga ya Dimapur district nungi alitsü.

Nagaland nung Coronavirus nungi taneptsü angur nisung 30,351 alitsü aser taneptsü anguba rate ya shilem 94.28 alitsü.

Tang state nung active cases 69 lir aser item rongnung nisung tuko dak iba tashidak agi temang

Central sorkar indang Executive aser Legislative branch tem tsüngta osangtsüsang junga magitep kar ali asü, ta nüji-nülem ajaki süngmanga bilemer, ta sangdong ajanga ashi.

Asenoki lungjemer ochi bushiba nung civil society teloktem, tribal hoho aser lokti tentet balalai tangatetba tajung aser democratic aser yimjung yimyatem sayuba ajanga alima dang Naga nunger noksa junga sayuogo, ta NPF ajanga kasa sangdong nung tenüngsang agütsü.

Ajisüka taremzüka aser teintet ka ama sayuba ya tajunglen nungi kanga junga shisadangtsüla aser democratic yimya masüba nung yanglua aliba tzüzung-ozüng agientsüla, ta NPF ajanga ashi.

Tanen makai iba Act atsülangba ya danga kecha masü saka Naga nunger mapang talangka timtema aruba nung tajangzük agitsü merangba ka dang lir.

Oting nung December 4, 2021 nü Indian Armed Forces temi tai maket civilian ter dak tema tepsetba tang tashi nüburtem molungjang nung mesamai aser Northeastern region ajunga densema Naga nungertemi obendang shidak agütsüsü aser AFSPA agientsü akhangba mapang Disturbed Area Act ano ita trok atsülangtsü sangdongba ya yirur aliba zübu nung metzü tali inoktsüba ka dang lir, ta ashi.

Naga nunger aliba tesem ajunga nungi Disturbed Area Act aser Armed Forces (Special Powers) Act 1958 agientsü atema NPF-i bendanga agütsür nokdaker aser iba nükjidong tongtetsü asoshi democratic yimya ajak maneni amshitsü.

Central sorkari telemtetba agia aliba tanaben mebilemdangshi tashi ajem ajema malitsü, ta NPF sangdong ajangasa ashi.


nung timtem agütsüba sümia lir, asen tera timtemer aser nisung 57 dak temang nung timtem mali.

Anogo trok atonga state nung iba tashidak agi asü-amaba mali, anungji tang tashi nung COVID-19 agi asür nisung 702 alitsü aser item rongnung nisung 16 dak danga tashidak keta liasü.

Ajak senteper COVID-19 agi menepa alir nisung 1,069 tashi danga state temi ogo.

Tang tashinung Nagaland nung COVID-19 alitsü temolung melemtet sample 4,22,653 tendangogo. Item ya RT-PCR ajanga 111,949, TrueNat ajanga 90,068 aser Rapid Antigen Test ajanga 2,20,636 tendanga liasü.

Centre-i Nagaland nung AFSPA atsülangshir



Kohima, Luchii/Dec. 30 (TYO): Centre-i Nagaland nung AFSPA ano ita trok atsülangshiogo.

Mangatep aliba iba Act ya Nagaland nungi agientsü asoshi asadangsü atema Central sorkari tematiba jenjang nung committee ka tenteter anogo ishika tsüngta iba mera ya agir alitsü.

Union Home Ministry ajanga December 30, 2021 nü Nagaland ajunga nung Armed Forces (Special Powers) Act (AFSPA) ya ano ita trok atsülangshia liasü.

Ministry ajanga sangdong ka nung, "Nagaland state ajunga ya 'disturbed' aser lendong aliba jejang ka nung lir aser civil tashi yaria armed forces amshitsü nungdak ta Central sorkari bilemer," ta ashi.

Iba Act indang Section 4 nung tashi agüja aliba amshia Central sorkari Nagaland state ajunga ya iba Act atema December 30, 2021 nü nungi tenzüka ita trok atema 'disturbed area' ta sangdonger, ta ashi.

Iba ama tesüsa mapang atsülangba ya June 30 nü liasü.

Iba Act ya northeast nung 1958 nungi amshia arur, koba agi "disturbed area" nung yoka aliba armed forces aser Central Armed Police Forces nem ozüng dak mapet inyaker tepsettsü, aputsü aser totuyuba makai ki mashi ka mita bushitsü aser Central sorkar nungi tenokdangba makai sepaitem ozüng aser obendangba bangdak nungi kumzüka ayutsü mela lir.

Iba Act indang Section 3 kübok Central aser State sorkari

State nung DAA atsülangba ya NDPP, BJP & NPF tai: RPP

sayur.

Dimapur, Luchii/Dec. 30 (TYO): Government of India-i Disturbed Area Act ano ita trok (June 2022) tashi atsülangba ya mang yima aliba nüburtem asoshi taoksatsü osang ka lir, saka state sorkari langka kar danga yimya balaka nung inyaktetla sü? ta tasüngdangba ka arur aser iba telangzübaji, hao inyaktetla, ta Rising People's Party (RPP) ajanga sangdong ka nung ashi.

Iba Act atsülangba ya danga kecha masü saka Oting nung nisung jenti tepsetba sülen NDPP, BJP aser NPF teloktep sorkari state nung AFSPA denaka mesüra medenia tensa azüoktetogo ta Government of India dang meshitetba ajanga lir, ta ashi.

Anungji UDA coalition ajanga khuret mabener asr nüburtem takum den maneni asayar, ta

totuyuba balala agütsüsü tashi agüja lir. Manipur sorkari December 8 nü State nung iba Act ya ano kum ka atsülangtsü sangdong ka agütsü, saka yangji Imphal nung aliba municipal tesemtem maden. Telungpur telok balalai azüdokshi mapa inyakba mechi Manipur state ajunga ya timtem aliba jenjang ka nung lir aser civil tashi yaria Armed Forces amshitsü nungdak ta Manipur indang Governor-i angateter, ta totuyuba nung shia liasü.

1980s mapang nungi Manipur nung AFSPA atsülangtsü sangdong ya Manipur sorkari agüja arur. Tesüiba kum 40 tsüngta Manipur atema Centre-i iba Act kübok sangdong kata agüja mali.

Nagaland nungi iba Act agientsü asoshi asadangsü atema Union Home Ministry ajanga committee ka tentetogo, ta Nagaland Chief Minister Neiphiu Rio-i December 26 nü metetdakja liasü.

Mon district kübok Oting yimtsüng anasa Army ajanga December 4 nü operation ka nung civilian 13 tepsetba sülen Nagaland nung longkak aitba tenzüka liasü.

Union Ministry ajanga "disturbed area" ya Nagaland aser Arunachal Pradesh kübok Tirap, Changlang, Longding district tem aser Assam den arütsüa aliba Namsai aser Mahadevpur police station tem kübok sangdonga lir.

Assam nung Union Ministry ajanga "disturbed area" totuyuba

ya2017 kum tashi agüja liasü. Iba sülen state ajanga iba totuyuba ya ita trok sülen tasen kuma yanglushia aru aser tesüsa September 10 nü metetdakja lir.

Centre-i Nagaland nung Armed Forces Special Powers Act (AFSPA) atsülangtsü lemtetba atema state nung civil society balalai aitsür.

Northeast nungi iba AFSPA ya agientsü atema ola tali adokba mapang Centre-i Brehostibarnü nungi tenzüka ita trok atema Nagaland nung iba Act ya atsülangtsü.

Centre-i iba telemtetba agiba ya magizükteter aser ibai Naga nunger tarutsü putu ajemreptsü merangba ka lir, ta Naga nunger lokti tentet temi ashir.

"Government of India-i Naga nübur tejangraba senzüka yutsüogo. Naga nüburi iba ya magizüktetsü," ta Naga Hoho tongti zülur Elu Ndong-i ashi.

"Tai maket nisungtem khasetsü aser tepsettsü asoshi Army nem tashi agüja ali tashi yangi yimjung malitsü," ta pai ashi.

Kasa mapang state nung AFSPA atsülangba ken o jembitsü asoshi Eastern Nagaland People's Organisation (ENPO) ajanga senden ka ayongzükogo.

"Yimten tebilemtsü tatem kati marudaktsütsü Government of India tebilemba lir. Parnoki tarutsü putu ajemrepa yutsüner," ta Global Naga Forum indang convenor, Chuba Ozukum-i ashi.

Iba Act atsülangba asoshi jashia jembiba mapang, "Iba mera yagi Naga nunger mesüshir," ta Naga Mothers' Association (NMA) advisor Rosemary Dzuvichu-ia ashi.

Nagaland nungi iba Act agientsü asoshi asadangsü atema Centre-i züngsem tenet agi akumba committee ka tenteter anogo ishika tsüngta iba telemtetba ya agir.

Centre-i iba committee dang par indang report ya ita asem tsüngta agütsüsü shia lir.

state sorkari azüoktsüla, ta Naga nüburtemi mapang talangka nungi takhangba ola adoka arur. Saka mapang talangka asen state lenirtemi lenmang danga ang bushia state nung meshidakba ajak nung Naga yimten ken o metembangteti aliba tenüng sena arur, ta RPP ajanga ashi.

State nung sorkar balalai yimsü süa aruba mapang par teinyaktsü meinyaktetba ajanga Naga nunger lokti tentet balalai maneni anema nokdakaka state nung AFSPA benoktsü asoshi Government of India nem maongka tajung agütsür, ta ashi.

Langka kabosa ataloktsüla, aser kanga tia maka Oting lendong ajuruogo.

Asen yimten yimsüsür kabu nung azü lir. UDA coalition-i yimsü asütsü temeden samaogo, ta RPP sangdong ajangasa ashi.

METETDAKTSÜR

Tanü December 31, 2021 anogo nungi sangkum 2022 kum January 2 tashi Tir Yimiyim nung inyakerem kum tasen sodi agir, anungji taruba January 04, 2022 Adok nungi dang Tir Yimiyim angutsü. Iba 2022 kum tasen asenok ajaki takum tajung nung ngutetsüsa sarasadema atadi.

Tir Yimiyim azünger aser meimertem ajak dang tepela kum tasen salem jelia metetdaksür.

- Yimozülur

Mulungnen O



Imnala Sanen (Akhoya)

08.02.1930 ~ 24.12.2021

Onoki kanga meima aliba ojala aser otsüla, **Mrs. Imnala Sanen** (Asür L. Sanen Ao kinungtsü), iba lima nungi pilar onok mangyim jashi nung alidang, kija - kibong, lokti tentet, arogo aser tembar medemertem aikati onok dang kanga meima nübo, rongsen aser sarasadem agi yariba asoshi onok kinungertemi nenok ajak dang kanga pelaba mulungnen o ka yangi lemsateper.

Benjong mapang süaka, pei mapa aser sentong ajak toktsür la nem tepila aküm agütsütsü asoshi nisung aika aruba ngua, onok mulungjang kanga sünepdaksüogo aser nenok temeim mapa tulu asoshi onoki nenok ajak dang kanga pelaba metetdaksür.

Ano, la den asüpila sentep nung medentetaka, shirnokisa sarasadem aser mangyim jashi lemsatepa onok mulung süneptsüogo, nenok ajak dang kanga pelar. Iba mulungnen o ya onok mulungjang ajak agi pelaba nenok den lemsateper ta bilema agizükdaksüner.

Nenok temeim mapatem onoki teti bilemtetsü. Tsüngremi nenok ajak moajangma.

- **Chirnur, Semchirsemmur aser Anük-apang.**

Dimapur Khensa Senso Telongjem Hon jubilee mungogo



Dimapur Khensa Sensotsür Telongjem-i ken atenba noksa nung angur.

Dimapur, Luchii/December 30 (TYO): Dimapur Khensa Senso Telongjem (DKST) Hon jubilee mungogo. Jubilee ya "Renkettüng" omen nung ajemdaker Cornerstone Higher Secondary School, Dimapur nung Brehostibarnü munga liasü.

Sentong nung o jembiba mapang tongti o jembir Rev. C Teyong Kichu-i omen dak ajemdaker jembir. Paisa, nisung shia Tsüngrem bushitsü aser pa

dak metaloker alitsü ajungshiba den sarasadema taküm liyonga aotsü ayongzüka liasü.

Jubilee sentong ya Dimapur Khensa Shisashir Telongjem sanen luden züngsem, Akangjungla Longchar aser Aoneken Walling na lenisüba nung agi aser lokti pelaa agizüka o DKST mendenbuba Chubaangshi-i jembiba liasü.

Maneni Jubilee Planning Board, convenor Sentimeren-i

Jubilee salem osang lemsatep aser Souvenir Committee Golden Jubilee, convenor Rev Wati Kichu-i jubilee kakat sayatsü aser Tongpangsucha-i tepela anküp o jembiba liasü.

Sentong nungsa Khensa Fellowship Chümoukedima-i saya ka saya, Khun Temen Zünga-i sobaliba ken ka aten aser Dimapur Khensa Sensotsür Telongjem aser Temsüchiba Jamir nungeri ken tena liasü.

NHHDC-i State Handloom Expo ayonger

Dimapur, Luchii/December 30 (TYO): Nagaland Handloom & Handicrafts Development Corporation Ltd. Dimapur-i, Urban Haat, Dimapur nung 2022 küm January 10 nungi 23 tashi State Handloom Expo ayongzüko. Iba expo ya Office of the Development Commissioner (Handloom), Ministry of Textiles, Govt. of India, New Delhi-i senotsü teyari agüja ayongzüka agitsü.

Sentong nung shilem agitsü

jangraba Co-operative Society, NGO, Apex Society, SHG temi expo nung shilem agitsü atema Project Cell, NHHDC Ltd, Half Nagarjan, Dimapur nung parnok züngoksemtetsü. Expo nung shilem agitsüpurtemi parnok indang passport size photograph copy ka, address tejangja, Mobile Number, Bank A/C No den IFSC code tem, 2022 küm January 7 nü matong tsüngda office mapang agitsütetsü. Nagaland nungi expo nung shilem

agitsüpurtemi ajak NHHDC Ltd., Dimapur nung züngoksema alitsü nungdaker.

Sentong nung shilem agirtemi bener aruba oset jenjang asadanger sentong nung shilem agidaksütsüpurtemi shimtsü.

Stall ajak angati asütsü aser exhibitors/stall ajak nem Lumpsum daily allowances agütsütsü, ta Managing Director, Zakabo V Rotokha, NCS-i sangtong ka ajanga metetdaksüogo.

AFSPA kübok "Disturbed Area" jenjang ya Manipur nung nungdak mali: MHRC

Imphal, Luchii/December 30 (Agencies): Northeast state balala nungi mepetmesü aketba ozüng; Armed Forces Special Powers Act (AFSPA), 1958 agintsü atema akhangba tali akümba mapang ka nung Manipur Human Rights Commission (MHRC)-i, Manipur nung 2021 küm January 1 nü nungi September 22 nü tashi nung telungpur dak sendakba timtem lendong kecha matalok, anungji Armed Forces kübok 'Disturbed Area' jenjang ya maneni benoktsü nungdak madoker ta ashi.

Imphal Free Press sangdong ka ajanga ashiba agi, MHRC tetuyuba dak ajemdaker Additional Director General of Police (DGP)-i, AFSPA agintsü atema benoka aliba ken o dak sendakba nung December 22 nü report ka benokogo.

"Union indang armed force

tem counter insurgency operation nung shilem magiba, telungpur aser armed force tem tsüngda mekatepba, January nungi September ita tashi nung mepetmesü kecha matalokba ya Manipur nung tensa junga aliba kuli lir," ta Commission-i ashi.

Ajisüaka state police-i, unlawful activities (prevention act) aser tanga criminal law dak ajemdaker telungpurtem inyakyim azüoktettsü, ta MHRC-i ashi.

Maneni commission-i ashiba agi, state sorkari Constitution, Seventh Schedule aser Union List nung Entry 2 kübok Union dang armed forces teyari meshitsüla.

Additional DGP (HR)-i benokba report asadanga sülen Commission-i, state sorkari AFSPA benoka aliba ya state ajunga nungi agintsüla, ta ashi.

IM-ABC aser NECU na longjem training agütsütsü

Dimapur, Luchii/December 30 (TYO) Tanü lanur aika zünger mapa mungui aliba ya Govt. aser lokti asoshi khuret tulu ka kümogo. Anungji iba

tebilemtsü nung lokti aser Arogoia shilem magira tarutsü asen lima asoshi khuret aika ajurutsü ta ajiteta 2022 nungi International Ministry of American Baptist Churches (IM-ABC) aser NECU na longjem "Holistic Economic

Development and Christian Business" nung ajemdaker zünger alir lanur nem training agütsütsü.

Dimapur nung ibaji mezüng East Dimapur Ao Baptist Arogo nung January 4, 2022, mapang 9 am - 12 noon atema tejangrar lanur 20jika atema ayonger. Anungji tejangrar lanurtemi item mobile ajanga osang agiteptsü mepishir; 7005501457/9436430463/8131865765

Tsüngremer tejembiba aser mangdang tesayuba ka yamai temeim neburtem dang lemsateper

~A. Imdong Jamir, Aokong, Dimapur

Ataloktsüba pongmang pungmangdaksüba yangi ashir. 30th December 2021 anepdang züngia 2:00 ako nung Mathi tapu 11:20 nungi zünger mejanga aonung yamai Tsüngremi sayu.

Tenem tulu ana angu- Aor aliba tenemji anünga tonga kanga dang talang aser tulu liasü. Long (rock) longpak kanga dang tulu yangji ni-a mener teburtem kanga dang nungzütepa asateper. Tebur aika nokdak dakji anenzüka sama aor aser long tulu temji longa alur. Tangar kin aliba tenem chibo kangabo malur ta pungmang.

Anungji saker Tsüngrem dang sarasadem-a asüngdang-Tsüngremi ashir.

- 2022 küm kibong aika nung tebu (father) mali tajeba alitsü.
- Tang wara (pandemic) yagi masü saka ajungben ajungben kibong aika nung tajeba alitsü.
- Yimdong nung tila tanurtem (children) tsürabur mali longsoa akümstsü.
- Sen asoshi taküm yoka senzür aika adoktsü.
- Arogotem telung nung rongrong aika adoktsü.
- Sen bushirtem talisa sayutsüngir tapu 2:8 nung shia aliba ama ataloktsü.
- Pei dak temolung ulua alemba pur Tsüngremi atsüdoktsü.
- Temeim mekongba agi nisung miema (hiding) tepseter aika adoktsü.
- Kijung lanu kibong aika jendong alutsü.
- Tang nungi laishiba amer tetsütem tali sarasademang ta Tsüngremi ashir.
- Meshirangi alima nungi aika aotsü ta ashi nung, iba pungmang ya Tsüngremi perokdaksünüa ashiba ashir. Iba osang azünger ajak Tsüngremi tali moajang.

Manipur densema state 5 nung assembly elections agitsü: ECI

Guwahati, Luchii/ December 30 (Agencies): Manipur densema state pongu nung renemer aliba ama assembly election agitsü.

Iba osang ya election commission of India (ECI)-i Brehostibarnü sangdonga

liasü. "Political party ajak nungi lenirtemi onok den ajurutep aser renemer aliba ama election agitsüla ta ashi," ta Chief Election Commissioner Sushil Chandra-i ashi.

Wara pokteter aliba mapang nüburtet tetsüngda

ita inyaksangshidaktsütsü atema polling booth tema timba kümtsüogo.

Kasa mapang nung Covid agi kongshir aliba tintet rogotem pei kidang nungi dang vote agütsütsü melatsü.

ECI-ias, election agitsü aliba state pongu; Uttar

Pradesh, Punjab, Uttarakhand, Goa aser Manipur nung nüburtet timba nem vaccine agütsütsü atema inyakyim ajungketshitsü.

Item state pongu nung election ya taruba küm tesadang tashi nungbo agitsü

ternemba lir. Assembly election agiba anogo vote tem anepdang 8 ako nungi nikongtsütsü 6 ako tashi agütsütsü.

CEC Sushil Chandra-isa, polling ketdangsurtem ajak vaccine dose anaprongla agir alitsü, ta ashi.



Government of India
Ministry of Agriculture and Farmers' Welfare



Tajungba aser Takarba kümteba Aluyimertem - Peisasa Nokdaktetba India tamaitüsü

PM-Kisan Samman Nidhi
Sen Rs.20,000 crore dak tali
Aluyimer kibong crore 10 dak tali dangi yoktsü

aser

Equity Grant sen
Rs. 14 crore dak tali Farmer Producer Organisations dangi yoktsü
- iba jagi aluyimer lakh 1.24 dak tali ajangzüksü.

Ato Kilonser Narendra Modi-i
sayatsütsü aser FPOS nungi teyari angurtem den sensaksemtsü
Video Conferencing ajanga 1 January, 2022 , Mapang 12:30 P.M.

PM-Kisan Samman Nidhi

- Iba sentong ya tenzüker, sen crore lakh ka ser meyirijang roker dak tali teyari angutsü pur aluyimer crore 11.50 dangi parnok bank account nung direct enoktsüogo.
- Iba sentong kübok, küm shia sen Rs.6000 asemben nung sen Rs.2000 küma lemsar teyari angutsü pur aluyimer dangi yoker.
- Iba dak aketba senotsü ajak India government-i endoker.
- Teyari angutsü purtem timtem repringtsü atema teyari agütsütsü pur shimteta lir aser Centralised Helpdesk tenteta lir.
- Iba sentong nung angutsüba tajangzük aser application indang yangi angutsü <https://pmkisan.gov.in> and Mobile App.

Farmer Producer Organisations

- Farmer Producer Organisations (FPOs)10,000 tentettsü atema sen Rs.6,865 crore yutsür
- 'Seed to Market' mangdang takok ngua inyaktsü atema linük nung block shia FPOs tentettsü
- FPO mapa inyaktsü atema matching Equity Grant sen Rs.15 lakh tashi agütsütsü.
- Security kecha meyui FPO shia nem Government-i sen Rs.2 crore tashi atema Credit Guarantee agütsütsü.
- FPOs atema Agricultural Infrastructure Fund kübok sen teyari agütsütsü atema Rs.1 lakh crore alitsü.

davp 0110113/00262122





TIR YIMYIM YIMOBILEM (EDITORIAL)

DIMAPUR ROGONÜ, LUCHII (DECEMBER) 31, 2021

Tamamatsü küm

Alima aso 21 buba nung ter asemsübuba (third decade) kumzüng tenzükba 2020 küm aser 2021 küm ana yabo alima mesama tashi putusa putu tetshitsüba tamamatsü küm asütsü. Atangji, medemdangra, 2020 küm dang nungibo 2021 küm tajungba liasü ta shitetsü, kechiyong 2020 küm ajungbena Covid-19 tashidak wara agi nisungtem tsübutepdaksüba amatobo mesüi tanem-tanemi Covid tashidak putettertem dang nungi taneptsü angurtemang teimba-teimba küma, tang tashi nung Nagaland nung Covid-19 tashidak wara anema raraba tongpang takok ngua odagi. Ibai kija, kibong, lokti tentet aser talisa arogotemi takok tashi yimten den yaritepa inyakba ajanga lir. Ano, Nagaland nung tajung kaji, Covid tashidak nokdangba mozü jem magidaksütsü atema olulu tapu tapu prokaka, nübortemi angatetba agi arishi küm 18 ser tema pur nisung lakh tenet ser meyi roker dak talii Covid jem agiogo. Nagaland nütsüng apibo, aji aika ta züngshitsü langa lir. Iba jagi shishilembadak, benjongbentsü, kaketreju aser tenla ki ama lokti adenshidak tesemtem nung tashidak menatepa aotsüba nungi meteta aser memeteti nokdangadoker. Aji oda, maparen aika nung inyakyim balaka aküm nungji, kaketshirtema kaketreju tonga moi kidang nungi dang online nung tesayurtem dang nungi lesson-tem angazük aser tatidanga online nung kidang nungi dang agüja aruba, tangang offline agitsü tenzükogo. Kasaji, arogo nungertema tenla ki lapoka lokti külemi sentepsü memela nungji, sentep ajak online nung dang agiba agi, kaketshisatsü bushiba nung aser tamangba nung nisung aika zübazübaa dang lia aruogo. Ashiko, tagitsü mait temulung magütsürtembo online class agiba ajanga kanga akoksar alitsü, saka ano tagitsü aitertembo online class-sa tajungba, medemer temeiner mali, aser pei tesayurtemi sayuba dang masü saka Youtube channel nung tangar tesayur tajungtemi sayuba dena bushia angar aser tajungba angazüketter. Aji oda, tashidak wara tasen den raratsü angazükba den ano tsüngdong moi online nung dang kechisarina nungdak ajak peria inyaksü tenzükba küm 2020 aser 2021 küm ana ya-ang shitakba alima aso 21 buba, 21st century, tenzükba tamamatsü mapang ka liasü ta angatetter. Atangji, Nagaland asoshibo 2021 küm ya Covid-19 tashidak agidang masü saka tamamangtsü lendong tulu atalokba agi tamamatsü küm ka kumogo. Aji oda, March 22 nü Peren district kübok Lamhainamdi ta ajaba yim anasa nisung asem tashi kasetba lendong atalokba ajanga nübortemi district administration meyong gari tashi rongdokja ain adokba mapatem agi Nagaland anüolentiplen tensa mejungi akümba mesüngjemeti alidang, ano ajungbena tamamangtsüka, December 4 nü Nagaland anüoklentiplen Mon district kübok Oting nung India sepaitemi, kenyongi taochi maka, tai maketba Naga nungertem kasetba tatalokbaji Naga nungertem otsü nung, ano ayatai anogo ka asütsü. Iba tatalokba ajanga Naga nungertem ajak mulungjang mangmanga kumdaksüogo. Iba ama anogoji kodaser amadoktettsü? Iba tatalokba yagi akhidang India sepaitemi Naga nungertem taochi makai reshikangshiba anogotem bilemtetdaksür. Aji oda, Nagaland nungbo benjonga memongtettsüsa, India sepaitemi Naga nungertem mezüngmeshiba otsü ya temulung ashitsüka lir. Atangji, 2021 küm alima tensa mejungaka, Nagaland nunga tatalokba tajung karbo lir. Item rongnung Nagaland nung district tasen pezü Noklak, Tsemenyu, Niuland aser Choumukedima district-tem akümba ya asütsü. Ajisüaka, pelanüaka mepelatet, 2021 küm tembangtsüsa atalokbaji, Oting nung India sepaitemi tai maketba Naga nungertem zü tokshiba sülena, ano tang India government-i Nagaland nung Armed Forces Special Powers Act, 1958 ozüng ya January ka nungi maneni ita trok tashi alitsü telemtetba agütsüba ya asütsü. AFSPA ozüng tamajung ya amshia akhidang nungi India sepaitemi Naga nungertem dak mapa tamajung kanga inyakogo, ajisüaka Naga nungertem AFSPA ozüng indang ya junga memetet aser mangateti aruba tangang angateta, iba ozüng ya Nagaland nungi agientsü atema ajaki ola adoker. Iba olaji kecha hau ta mali, ano ita trok kasa ozüngji amshia Nagaland nung inyaksü atema India government-i India sepaitem nem tashi agütsüba India government-i Naga nungertem mezüngmeshiba mapa ka asütsü. Külen Naga nungertem yimten nüchiso bushir teloktem denbo yimjung yanglua ayu saka külen AFSPA amshia tai maketba Naga nungertem taküm, tapayua mapayu, shirurua memeyong kasetbaji Naga nungertem otsü nung tamamatsü otsü asütsü. Iba ama ozüng tamajung tesashi amshia tai maketba Naga nungertem taküm samatsüba atema ochi obendang bushitsüba Naga nungertem ajak arok khuret lir. Atangji, küm tasen tepela salem shinür saka 2021 küm ya tatembang mazü ka tembanger, anungji 2022 küm tenzüktsüba ya Naga nungertem asoshi shisabolutsüka bilemer. Ibai Naga nungertem asoshi Tsüngrem dak jenoktsüba mapang lir. David chubai ashi ama, asenok teyariji kongnungia marutsü saka Kibuba nungi arutsü. T.Ken 121.

OLEMSABANG

Lokti taküm nung ochimashi mapa aser laishiba

~ Imtiwala Imchen

(Yashi adok nungi...)

3. Sen meimba yong pei meyongnem temeten (voting rights) ayokba ochimashi mapa

Indian Constitution kübok Article 326 nung 'Universal Adult Franchise' ratet jangja jangja zülua lir. Iba UA franchise ajanga, India linük nung senso kati pa/la küm 18 junger külen (irrespective of their caste or education, religion, colour, race and economic conditions), election nung pei representative shimsü tashi agüja lir - koba dang sensopur ka meyongnem temeten tashi (the power of voting rights of a citizen) ta ajar. Iba meyongnem tashiji kanga senti süaka, tanü aliba lokti aika nung, Nagaland state-a dena, iba temetenji sen yong yoka achiba angur. Iba inyakyim ya tesasatsü tulu ka lir. Asen tendak ibai ochimashi mapa tulu rongnung ka lir. India linük/Nagaland kübok alir ajaki sensopur ka pei meyongnem temeten aser tashiji metsünga reta amshitsüla. Iba temeten wazüka ayutsü atema awareness campaign for voting rights alitsü tim. NBCC aser ABAM ajanga Clean Election Campaign ayongzükba nungji Naga sensopur ajaki tashi itta nübo aser shisatsü agi yariteptsüla.

4. Sen meimba yong dang pei livelihood yokdokba

Aikati Nagaland state nung employment opportunity maka ta jembir. Lanurtem aikati school aser college züngzüker külen sorkar kübok mapa angutsü dang yimla-a atar. Hau, atangji meritorious candidates ishikabo mapa angutsü, saka tazünger teimba ka Govt. mapa mungui atemtsü. Kechiyong NPSC nung aiben adianu dang shimba, süpokrem agiba, item ochimashi inyakyim agi asen linük majunger aser mainer. State nütsüng yongsük aser alima tasazük yari pei-pe sasa mapa bushiteta inyaksü lemanu aika lir. Tatishitsü agi: agriculture, horticulture, fruit plantations, fruit industries, tea industries, entrepreneurship/businesses, ano aika lir. Saka tia maka item mapa aika, talisa small and big businesses ajaki pei-pur bendangeri dang agizüka inyakdagi. Iba ama taküm alitsü mapa anguyim (livelihood) bendangeri rakzüker inyakbaji, Naga sensopur mapa meranga inyaksü (work ethics) samaba ajanga lir.

5. Naga linük nüchiso bushirtem telok jenti

Naga nüchiso bushir telok aika akümba ya kechi tai? Telangzüba lemanu aisü nungi angutsü akok. Tat, agi, political differences, leadership crisis, regionalism, a.a. Iba dak alaka ano, osang zülur aser political scientists, political think-tank ajanga asadangtetba kaji leadership raktepa sen mesüra alirongsen mechi nung Naga nüchiso kuli amer telok balala-i Naga nübur aser business community dang nungi multiple-tax meshia agitsü mechi nung pei-pe telok tilala jakshia aor ta ashir.

Kasaji ochimashi mapa Mr. C.T Jamir, Senior Advocate, pai ajangshiba aika lemsatet. Pai ashiba olen kar yamai:

Donation aser Naga nungertem

Lokti tentet Naga lima nung onsara lir, aser telok ajak sen saru agi dang inyaker. Sen sarua inyakba ajanga aiben lokti menendaksür. Tat, agi, lokti mapa ka kodang inyakdi ta südir, ministers, officers aser VIP dang teyari meshir aser asüngdang. Parnokia pei position den apet agütsütsü merangdang aser mapa tajungba inyaker ta sayutsü merangdang aiben meteta aser memeteti ochimashi mapa nung shilem agitsüsa akümer. Donation meshidang, nisungba tashi alema agütsüdang aiben ochimashi mapa inyaker.

Akhidang tsüraburi ashiba agi, yimsüsür kibo tazüng alir ta ashi. Yimtem/telok mapa nung mapang ajak entoker asü nung parnoki pei kibong asoshi rongsen bendena rizüngtsü mapang magütsüteter. Aser takartemi lokti aser kija timtemba mapang balala nung tenzüka yaria aru. Saka tanü tensa kodang repringdir, iba inyakyim ya mashilen mapa ka kumadoker. Yimsüsür inyaksü atema takar dang shimer anungji takar kati kodasür pa rongsen teimba akümtsü ibajiang tongtibang bilema, rongsen bendentsü nung temulung agütsür (money becomes the primary consideration). Anungji nüburtem atema inyaksü aliba maparen meinyakteter. Yimsüsürtem aser sorkar mapa balala nung inyakertemi pension mangudang, mapang arishia, taginüba onsara ali nung, aiben ochimashi mapa inyaka pei meyong masüba rongsen agisemadoker aser corruption mapa nung tensem alir.

Ochimashi mapa nung kechiba shilem agitsüsa akümer?

- Nisungeri pei tashi aser akaba alema inyaksü merangdang
- Tangar mejashidaksütsü (hurt) mechi nung ochi mejembir
- Rongsen peria maliba ajanga (Economic backwardness)
- 20th century tashibo sorkarji teyarir (provider) ama süa arugo aser sorkar dak tali metaloka aruba agi joko pei sasa inyaktetsü tamkoktsü akümer. Anungji 'Government hangover' agi aika kangshir. Sorkar nungi tim mesü anguba scholarship, quarter, ali aser gari teti atema pei meyong küma amshibaji kecha tai mali ama bilemer. Sorkarjiang asen tekümzüker ama bilema iba dak tali metaloka alir.
- Pei sasa kecha meranga meinyker aser angati agi dang ajak aginüba shisatsü/tangatetba.
- Ajizüka inyakdang pei tashi (capacity) agi makok inyaker koba ajanga ochi mashitsü mapren jenti adoker.

Ochi nung alitsü atema teinyaksü

- Kechi majung iba indang maneni jembitsü nungdaker aser ibaji ajanga tarutsü teinyaksü lemanngi bushiteter. Aiben tai aser tamajung ajitetet saka tasü itta maitür mesüra melenshitsütsü memeranger. Iba jagi ochi mebenshiteter. Ochimashi anema noktaka, ochi mashiba melenshitsü atema, mezüngbuba nung nisung shia-i ochi jembitsü nungdak.
- Donation ajanga dang kobika alitsü? Iba shisatsü nüburtem rongnung malitsüla.
- Tangari asen yaritsü teimla nung mesüra tangar dak dang temulung lemer malitsüla, saka pei sasa meranga inyaka alitsü merangtsü nungdak.
- Tangatetba agi kodang peridir idangji taginüba ajemtsü. Tangatetbai matong dang rongsen agi menepadoker alir. Nisunger taginüba tanen maka, kodanga teperiba malir.

Lokti nung ochimashi mapa asoshi Laishiba tetuyuba

Sayutsungir 5:10, "Shibai sen meimer sen agi tenük masüngtsü; shibai rongsen meimer rongseni tenük masüngtsü; ya-a amajok dang lir." Rongsen penpuba agi na kodanga tenük-mesüngdaksütsü. Hau, atangji rongsen jagi kodanga tenük masüngtsü, aser rongsen jagi asen taküm tejangraba telangzüba magütsür. Kechiyong nisunger taginüba kodanga tatembang maka. Tetezü, ne senpong renlokba amaji, tebilemba tasen, taginüba tasen bendenlokyonga aor. Sen jagi kodanga ne nem tatembangtiba tenütsüngji magütsütsü.

1 Timoti 6:10 nung yamai ashir, "Kechiyong sen meimbaji tamajung tapu ajak tera lir; aser aji bushi nung nisung kar tamang nung mashileni anir oa, tejashi jenti agi pei temulungjang ateta tsüngogo." Senji tai masü, saka sen meimbaji tai ta yangi ashir. Kodang nai ne sen teimba akümer mesüra bendendir, iba amaji ne taginüba, achi-ajemba, libaliru, aser teblemtsüsa teimba akümtsü. Tangazüktsüji ya: asen taküm-i agütsütetba dak aliabo temeshi!

A Shin 14: 34, "Temeshibai kin ka ajungkettsür, saka kechi kin südir süaka temenenji taksü ka lir." A Shin 15:27, "Tiyazü tajangzük asoshi merumerui pei kibong timtemdaksür; saka shibai süpokrem sempadir pa taküm alitsü." Merumeru aser süpokrem agibaji tai aser asen lokti asoshi tekümdangtsü tulu. Ibai dang masü, Naga lima ya Sodom aser Gomorah yimti ama temenen jenti, jabujari aser memeshiba agi sünga lir (Lipok 18 -19). Nagaland ya Khristan teimba aliba state ka sür nung, tanübo Khristan jakla mesayuteter. Ibai taksü mapa. Iba ama tia tamajungji asen nübur ajak tashi mait aser ochimashiba ajanga bener arur. Asen putu tensa nung lokti taküm nung kükümshiba aser takutsüngsen (social rejuvenation) ka nungdaker. Ibai Khristan shia teblemtsü aser teinyaksü kümdi.

Arogo Teinyaksü

Arogo nung tekülem aser sayutsüngiba yimya alima kera ainba den tapet tajungba nung melenshia, nüburtem aser lokti nung kechi nungdak ibaji anagteta Tsüngrem O tesayuba agütsütsüla. Tanü asenok digital world nung alir asü nung, terenlokba jenti angur aser itemji amshia küli asüba maparen nung tali renloktsü nungdak. Lanurtem jenti post graduate tashi zünger ki sünga nungtena lir aser government mapa atar. Anungji, Arogo ajanga pei sasa inyakteta alitsüba (Self-employment/entrepreneurship) short term tesayuba training agütsütsü kanga nungdak. Arogoi lanurtem tali ajungmesoa, loan agüja yariseptsüla. Itemji tanelaren mapa masü ama medoktsüi, theology of entrepreneurship tali angatetsüla. Post-pandemic mapang self reliance/self employment lemanu mebusi nungbo talidak makatsü. Mapa meinyaki dang rongsen bushiba (easy money), iba work ethics samaba ya meyiba bushitsü kanga mapang tongja tongogo.

Iba Olemsabang nung lemsaba ken-o aser shisatsü ya iba oset züluri bilemba ken-o ama tazünger angateta agitsü mepishir



Cape Town, South Africa nung putirtemi Anglican putir, Emeritus Desmond Tutu tasü mang St. George Tenla kidangi bener aoba noksa nung angur. Nobel Peace Prize angusang, Tutu ya December 26 nü alima nungi pilaogo.

2021 küm FCA-i Laishiba 208,000 angati lema agütsüogo

December 30, 2021: 2021 küm Fellowship of Christian Athletes (FCA) teloki Laishiba 208,000 dak tema angati lema agütsüogo; FCA telokisa alima tesem balala nung coach tem aser saisapongertem dang Yisu Khrista osangtajung tesem ajaklen proktsü atema saisapongba sabang amshitsü ayongzüük.

FCA telok ya sports camps aser tanela asentenshi sentongtem ayongzüka agiba ministry ka lir. Parnokisa Laishiba alemba ajanga Tsüngrem O proker.

FCA tentetba sülen küm 67 ajungba küm nung parnok Laishiba 208,624 lema agütsüogo.

Osangbener den jembidang FCA Tir aser CEO, Shane Williamson-i, "Onoki Laishiba alemba ministry nung rangloker inyakba ajanga Tsüngremi Fellowship of Christian Athletes maneni moatsür asütsüa akok, ta ni amanger. Tsüngrem O proktsü atema onoki maneni inyaktsü. Alima tesem ajungalen coach tem aser saisapongertem ket nung Laishiba agütsüba ajanga Tsüngremi sayatonya inyakba onoki meteter," ta metetdaksü.

2021 küm atema FCA omenji

'Pursue' liasü, aser iba omen ya 1 Timoti 6:11 nungi agizük.

FCA ministry-i tesüiba küm aika Khristantem dang saisapongtsü ajungshiba den külemi pei tamang jenjang nung akanga nokdaksü ajungshia arur.

1956 küm mezüng FCA-i Athlete's Bible adok aser küm shia parnok Laishiba cover nung parnok Logo amshiba den omen balala amshia arur.

FCA-i sports camp aser tanela asentenshi sentong nung adenertem nem Athlete's Bible agütsür aser tangbo nisung aikati iba Laishiba bushir.

2003 küm FCA-i Sports Bibles adok; iba Laishiba ya Sports New Testament lir aser iba Laishiba nung saisaponger nüngtugu aika indang taküm kuli densema lir. Tanü tashi nung FCA-i iba Laishiba million 1 dak tema menüngogo.

2006 küm mezüng FCA-i Spanish oshi nung Tasen Lai adoka liasü aser iba mapang nungjagi tenzüka parnok oshi balala nung iba Laishiba adokogo, item rongnung Chinese aser Spanish Testament- Heart of an Athlete devotional, Japanese Baseball New Testament, Chinese

Sports Devotional Bible aser Russian Coach's Bible densema lir.

2017 küm nungi tenzüka FCA-i Thai Sports New Testaments 50,000 aser Vietnamese Sports New Testaments 10,000 dak tema menünga lemtsüogo.

2018 küm Korean, Mandarin, Spanish, Portuguese, French, Ukrainian, Russian aser Urdu oshitem nung FCA Sports Bible Handbooks adoka liasü. Tanü tashi nung FCA-i New Testaments, Sports Bibles, Sports Bible Handbooks, Arabic, Thai, Indonesian, Vietnamese, Mandarin, Korean, Urdu, French, Russian, Ukrainian, Spanish, Japanese aser Portuguese oshitem nung Laishiba adokogo.

2013 küm FCA-i YouVersion den longiemer camp Bibles ajak electronic versions nung sayaogo aser Spanish, Ukrainian, Russian, Chinese aser Korean densema oshi aika nung YouVersion Bible reading plans 50 sayaogo.

"Küm 67 tashi FCA-i alima tesem ajungalen nisungtem nem Yisu metetdaksütsü atema rangloker inyaka arudar," ta Williamson-i metetdaksü.

UK nung lockdown mapang talidak ki malir yariba atema pastor ka merenshi

Nottingham, Luchii/Dec. 30 (Agencies): United Kingdom nung talidak ki malirtem anidenba mechi kanga sashia merenshiba pastor ka okadak ken o jembiba nung takok anguba benjonger.

COVID lockdown mapang Nottingham kübok tesem kar nung osang tajung lemsatepba mechi 2021 küm February ita police temi Pastor Chizumie Dyer dang senchi sen \$21,000 achi. Christian Legal Centre (CLC) den aliba okatsür temi ashiba agi, ita tetenzüklen Nottingham Magistrates Court ajanga pastor bukuma obendang agütsü aser sorkar dang la indang legal fee menoktsü totuyuba agütsü.

"Ni temolung anisüngzüker. Ni kanga pelar. Okadak nungi

iba obendang agütsüba ya ni asoshi anisüngzüük ka lir. Dangartemi kechia meinyaktetba mapang onoki timtema alirtem asoshi nokdak.

Asenok teyari nüngdaker nisung lir aser parnok soseta asütsü aliba nungi onoki kumzüük ta kari ashi," ta Dyer-i osangbener dang ashi.

February ita lai kima nung sentong ayongzükdak talidak ki malir nisung 30 jungnüa arua shilem agia ken aten, Tsüngrem külem aser külemi chiyongtsü talem achi ajem asü.

Parnok adenshiba mapang Pastor Dyer-i ozüng shidak amshiaka commanding officer-i parnok adenshia aliba osang ya pa dang temaba lenir nem agütsü aser parnok ya ozüng alema adenshiba ka lir, ta sangdong.

"Parnoki onok dang nenok

sentong maneni agitetsü saka tekülem ki nung gari anena ayudaki aotsüla ta ashi aser yamaji onok ao... ano parnok anidaka aru," ta Dyer-i ashi.

"Talidak ki malir aser temesepba mozü achir tem nem onoki teyari agüja liasü aser yamaji inyakba atema onok mapa tamajung inyaker ka ama amshitsü ya kangasa tim masü."

"Ni police dang mepelai liasü. Iba mapang ni kanga jashi aser onoki kecha miimshia mali aser onoki police den külem sür inyaktsü, kechiaser onok nükjidong ji ozüng alema kodanga maotsüba lir," ta Pastor Dyer-i ashi.

"Iba otsü yagi nübur dang Christian street ministry ya kanga tongtipang lir ta sayutsü imlar," ta lai ashi.

ANO GO ABEN TSÜNGREM DEN

Nai khrista den temulung asütsü akok

Shibai ni tashi itdaksür Pa dak ni ajak inyaktsü akok. Filipi 4:13

Filipi arogoi pa tenzüka mapa nung yariba asoshi Pauli parnok nem tenüngsang agüja zülü. Yangi pai nübur dang pelaa alitsü ashi (t.4), kecha atema shisa mebulutsü ashi (t.6) aser ochi, akhümtsübu aser shidakba nung temulung ayutsü ayongzüük (t.8). Idangji pa nüngdak nung koda talubusa angu (rishikangshiba indang mejembi) iba indang ashi. Pai ashi, "Shibai ni tashi itdaksür Pa dak ni ajak inyaktsü akok." Pai kechi tetezü ashir? Pai inyaknüba ajak inyaktsü Khristai pa tashi itdaksür ta pai ashir asü ? Ibaji masü ! Pa peria akadang aser sensaka alidang Tsüngremi pa nem temulung süa lidaksüba indang pai jembi.

Yisu tenüng tetshia nai inyaknüba inyaktsü iba tekong yagi ashir asü ? MASÜ ! Mapang tajung tamajung ajak nung Tsüngremi mulungba nai atalokdaksütsü Tsüngremi ne nem tashi agütsüba indang iba tekong yagi mejembir. Rishikangshi mapang nunga nai aremzüka Pai mulungba atalokdaksütsü akok. Kechi asoshi na aja iba nung rangloker nai tashi anga aser tamang agi apusora, nai takok angutsü, kechiaser Pai na tashi itdaksütsü. Khrista asoshi mapa kar inyaktsü na tashi nüngdakra Paul ama kümang, shibai tashi mait nunga temulung süa liasü.

"Aji asünung Khrista atema mekokmin nunga uludi" (2 Kor. 12:10).

Sarasadem : Oba, kü taküm nung Khrista aliba ajanga ni kechisarena nung temulung süa alitsü kü dang yariang. Amen.

Briarwood Presbyterian Arogo tentetsang, Frank Barker süogo



Ki shopping center ka nung liasü saka küm asem dang lirbo Tenla ki melen.

1988 küm Barker leniba nung dollar sen million 32 indoka Tenla ki tasen yanglu, aser küm ter sülen ano dollar sen million 5.5 indoka Tenla ki süloka liasü.

1965 küm Barker leniba nung Arogoi Briarwood Christian School tenzüka Birmingham Theological Seminary tenzüka liasü.

Barker tongti pastor nungi anisüngzüükba sülen Rev. Harry Reeder-i pa melenzüka liasü.

Hombarnü Rev. Harry-i Facebook post ka ajanga, "Pa ya osangtajung prokba ministry nung tesayur ka liasü.. Pa ya kanga tongmelang, Tsüngrem tsübuba aser mangdang tajung aliba pastor ka liasü," ta lemsatep.

"Pai Tsüngrem O aser Par Arogo meimba den tenyaba wadang tulutiba inyakogo," ta Rev. Harry-isa lemsatep.

Barker-i tongti pastor nungi anisüngzükyonga pai tawa tashika Briarwood aser tesüsa 1999 küm anisüngzüka liasü. Mezüng iba Arogo Tenla

December 30, 2021: Birmingham, Alabama nung Briarwood Presbyterian Arogo tentetsang, Rev. Frank Barker alima nungi pilaogo; pa arrshi küm 89 liasü.

Tanübo pai tentetba Arogo nungji züngsem 4,000 dak tema lir. Pastor Barker Hombarnü (December 27) süogo, ta par jala Peggy Barker Townes-i metetdaksü. Pa masü asobo taruba ita (January) pa arrshi küm 90 ajungtsü liasü.

Osangbener den jembidang par jala, Townes-i, "Pa tasünü tashi pai taküm junga liogo. Pa ajanga onok kanga moatsüogo," ta metetdaksü.

1960 küm Barker-i Briarwood Presbyterian Arogo tentetba mapang nungi tenzüka pai iba Arogo ania liasü aser tesüsa 1999 küm anisüngzüka liasü. Mezüng iba Arogo Tenla

OLONG PAITEP # 6039

	1				2			3		4
5								6		
7			8							
								9		
		10								
11										12
					13					
					14					
15										
					16					

TIPILEN		LANGTSÜNGLEN	
1. Balaka	- (5)	2. Hai sür inyak	- (4)
6. Aika shirangba	- (4)	3. Aor tenüng ka	- (6)
7. Tar tatsü	- (6)	4. Ali telungi talangka lur	- (5)
9. Nenü'er jabaso	- (4)	5. Tebang kenyongi mazüoker	- (4)
10. Sen latettsüba	- (7)	8. Ken atema anenzükertem	- (5)
11. Tangar kübok alir	- (4)	9. Toktepa noktak	- (5)
14. Lon nung inokba	- (6)	10. Sen	- (6)
15. Tzü ayimdak	- (4)	11. Benjong agi	- (5)
16. Ajok	- (5)	12. Telung nung rizünga ayu	- (4)
		13. Tebang nung enok	- (4)

OLONG PAITEP # 6037 TELANGZÜBA

TIPILEN :	LANGTSÜNGLEN :
2. Anükalem, 5. Mesak, 6. Apet,	1. Semdang, 2. Ayak, 3. Leptep,
10. Meimtep, 12. Posü, 13. Patak,	4. Timatem, 7. Nati, 8. Yiar, 9. Sangken,
14. Tekettsü.	10. Metsük, 11. Mazü, 12. Apitet.



ALOKBA ASÜYIM NUNG :

Alokba akümüli tempanger tanüla kodak kikümbang tonger lia putir Peter arua nokdak.

Alokba : Tamarener, ni arur ako. Jara tasüng anütetsü(wall clock) yitaka aliba kechi atema?

Peter : Ibaya nisung shia tiyazü jembiba nokdsa lir, nai tiyazü jembiba shia iba anütetsü nung aliba tekaji khen jajatsü.

Alokba : Ibaya shiba indang?

Peter : Iba ya Mother Theresa indang, lai taküm piyong tiyazü khen danga mejembiji kodanga marakzüa.

Alokba : Tamarener iba ya shiba indang?

Peter : Ibaya missionary ba indanga, pai koda masü anaben tiyazü jembitsüsa akümüji anaben arakzüogo.

Alokba : Iba jaka yabo tazüngato, yagi shiba meyong liasüba ya?

Peter : Idaki Namoba indang liasüba Yisu indang room nung lir, pai pangka, fan melena ayipdaktsüdar.

Lilir : WhatsApp

TANÜBO NAI LANGZÜANG

Q. Tawa linük kobai 'Tsirkon hypersonic missile system' saya?

[A] China [B] Russia

[C] UK [D] Israel

_____ (Taruba adok nung onoki langzüsü)

YASHI ADOK TELANGZÜBA : Kerala

AO OSHI ANGAZÜKDAK:
TANÜ ANGAZÜKTSÜBA OJANG

Longten
 (v) salaa aliba telong küma ayu (roll up)
 * Ni anepdang shia kü yipten sü **longtener** ayur.

Lusa
 (v) telong tena aliba piladaktsü (break into bits)
 * Parnoki atakba sü aser jara ajak **lusa**.

Tepela Tasoba Anogo

Tanur asoba anogo nung salem osang den noksa angati adokdaktsünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

NAI-A YA METETTER MA

JANUARY 2022' NUNG TONGTIBANG ANOGO KAR:

- 1 January	Global Family Day
- 4 January	World Braille Day
- 6 January	World Day of War Orphans
- 8 January	African National Congress Foundation Day
- 9 January	NRI (Non-Resident Indian) Day or Pravasi Bharatiya Divas
- 11 January	Death anniversary of Lal Bahadur Shastri
- 12 January	National Youth Day
- 15 January	Indian Army Day
- 23 January	Netaji Subhas Chandra Bose Jayanti
- 24 January	National Girl Child Day
- 25 January	National Voters Day
	National Tourism Day
- 26 January	Republic Day
	International Customs Day
- 28 January	Birth Anniversary of Lala Lajpat Rai
- 30 January	Martyrs Day or Shaheed Diwas
	World Leprosy Eradication Day (Last Sunday of January)

SUDOKU # 6079 TELANGZÜBA # 6077

3	9					4	6	2	4	3	5	1	8	6	7	9	
			9	3	7	2		8	6	9	5	4	2	7	8	3	1
	7			6				5	7	1	8	9	6	3	2	5	4
	1	3		2		8	6		3	7	1	8	9	5	4	2	6
2				9	3	1		7	5	2	9	6	4	1	3	8	7
				1	8	4		2	8	6	4	3	7	2	1	9	5
8							2	1	4	3	6	7	8	9	5	1	2
	3			5			7	4	9	5	2	1	3	6	7	4	8
5		4	1	7		9	8	3	1	8	7	2	5	4	9	6	3

OJANG LUTEP # 5625

BUNÜR : [][][][][]

AKAJ : [][][][]

NGDA : [][][][]

ITR : [][][]

IMYYIM : [][][][][]

NGAJAA : [][][][][]

MKÜ : [][][]

ASTEN : [][][][][]

LEMSA : [][][][][]

NEABER : [][][][][][]

OJANG LUTEP TELANGZÜBA # 5624

PEI DAK TAMANG KATETA ASER MERANGA INYAKBA AJANGA TAKOK AAZÜKER



December 30, 2021 nü Vigyan Bhawan, New Delhi nung Union Finance Minister, Nirmala Sitharaman-i state balala nungi finance minister tem den Budget dak sendakba senden ka amenba mapang tangokba noksa nung angur.

India nung nisung 961 dak Omicron putetogo

New Delhi, Luchii/ December 30 (Agencies): India nung ano nisung 13,154 dak coronavirus tashidak putetogo aser ibaji yashi den medemdangra shilem 43 agi timba lir, ta Brihostibarnü Union Health Ministry-i metetdaksü. Tang linük nung coronavirus agi teshirangdakpur 82,402 kümogo aser nisung ajak senteper 961 dak Omicron putetogo aser parnok timbaka Delhi (263) nung lir. Tesüiba ghonda 24 tsüingda coronavirus agi shiranger 268 asü aser tang tashi nung iba

tashidak agi nisung 4,80,860 süogo, ta Health Ministry-isa metetdaksü. Ano külen, Bodhbarnü World Health Organization (WHO)-i, Omicron aser Delta Covid-19 variants ya tebilemsü onük ka kümogo, aser iba variant ana ya ajanga nisung aika hospital nung mongdar aser aika südar, ta metetdaksü. WHO-isa, tesüiba hopta ka tsüingda alima nung coronavirus case shilem 11 agi timba kümogo aser United States o France na nungbo anogo shia nisung timba-timba dak iba tashidak puteta arudar, ta

metetdaksü. Tang India nung anogo shia coronavirus positive putetba shilem 1.10 kümogo aser hopta shia positive putetba shilembo 0.76 dang lir. Tesüiba ghonda 24 tsüingda India nung samples 11,99,252 tendang aser ibaji densema tang tashi nung samples ajak senteper crore 67.64 (67,64,45,395) tendangogo. Tesüiba ghonda 24 tsüingda vaccine dose 63,91,282 agütsüogo aser Brihostibarnep 7:00 ako tashi nung vaccine dose crore 143.83 (1,43,83,22,742) agütsüogo.

Party ajaki UP elections mapang shidak nung aginer: Sushil Chandra

New Delhi, Luchii/ December 30 (Agencies): Brihostibarnü Chief Election Commissioner (CEC), Sushil Chandra-i, Uttar Pradesh nung yimtenren party ajaki election commission ajuruogo, aser parnok ajaki mapang shidak nung assembly elections aginer, ta metetdaksü. Anogo asemnü Uttar Pradesh semdanga election atema terenemshiba asadangba sülen Brihostibarnü New Delhi nung osangbenertem senden ka nung jembidang Chandra-i, Uttar Pradesh nung assembly election matsülangtsü, ta metetdaksü. "Yimtenren party ajak nungi

lenirtemi onok ajuruogo, aser election matsülangi coronavirus wara anema tetuyubatem benshia mapang shidak nung election agitsü atema onok dang mepishiogo," ta paisa metetdaksü. "Voters timba akümba den külemi tang state nung wara tensa apir onoki nisung menungteptsü atema polling station 11,000 tali amenoktsü telemtetba agiogo. Iba denji külemi sepaitema tali lezmüktsütsü aser polling stations nung nisung menungteptsü atema election ghonda ka tali agitsü," ta paisa metetdaksü. Sangküm küm tetenzüklen

Uttar Pradesh, Uttarakhand, Punjab, Goa aser Manipur state tem nung assembly election agitsü. CEC-isa, voters final list January 5 nü sangdongtsü aser anepdang 8:00 ako nungi nikongdang 6:00 ako tashi election agitsü, ta metetdaksü. Ajisiüaka Uttar Pradesh nungbo election ghonda ka tali agitsü, ta pai shisem. "Arrshi küm 80 ser t e m a p u r t e m , matamabensarter aser Covid agi shirangertem pei kidang vote agütsüdaktsütsü atema Election Commission nungi ketdangsertem ki tonga aotsü," ta CEC-i metetdaksü.

Jammu & Kashmir nung kiralongrar 200 dang kümogo: IGP

Srinagar, December 30 (Agencies): Brihostibarnü Inspector General of Police (IGP) Kashmir, Vijay Kumar-i, Jammu & Kashmir nung kiralongrartem 200 den tajemba kümogo aser tang mezüng lisopur kiralongrartema 100 den tajemba kümogo, ta metetdaksü. Kulgam aser Anantnag district na nung khatepba sülen osangbenertem senden nung jembidang pai, "Onoki Kashmir nung kiralongrar 200 den tajemba kümogotsüogo, kechiyong tangbo parnok 180 shi dang kümogo. Tang mezüng lisopur kiralongrartema 100 den tajemba kümogo. Yashi khatepba sülenbo parnok 85-86 shi dang anüngogo, ibayongji kiralongra ajema akümer," ta metetdaksü. Taküm lisopur 128 shi telok balala nung aden saka parnok rongnungji 73 kasetogo aser 17 puogo, ta paisa metetdaksü. "December ita kija nunga kiralongrar 24 tepsetogo aser

parnok rongnung Pakistan nung kiralongrar pongu densema liasü. Onoki parnok ket nungi US-made M4 carbine rifles ana, AK47s 15, pistol 24, grenades aser IEDs aika puogo. Iba tetezü Pakistan Jaish-e-Mohammed (JeM) kiralongrartema densema liasü. Security sepaitem aser intelligence network kanga kümküma lir," ta paisa metetdaksü. Ano külen Senior Superintendent of Police (SSP) Anantnag, Ashish-i, Kulgam aser Anantnag nung raraba mapang kasetba lisopur kiralongrar anaji Nisar Ahmed Khande aser Mufti Altaf na liasü ta jangjaogo, ta metetdaksü. Bodhbarnep Jammu & Kashmir kübok Anantnag aser Kulgam district na nung khatep tenzüik aser Brihostibarnep rara anena liasü. Iba rara nung Pakistan nung ana densema JeM kiralongrar trok kaset aser sepai-a ka asüba den asem yiru.



December 30, 2021 nü Patna nung aliba hotel ka nung health worker kati tetsür ka nem coronavirus vaccine tutsüba noksa nung angur.


January 3 nungi arrshi küm 15-18 purtem nem vaccine agütsütsü

Mumbai/Delhi/Chennai/ Kolkata/Guwahati/ Chandigarh, December 30 (Agencies): Khristmas mapang nung Ato kilonser, Narendra Modi-i, January 3, 2022 nungi arrshi küm 15 nungi 18 tsüingdapurtem nem coronavirus vaccine agütsütsü, ta sangdongba sülen state temi parnok nem vaccine agütsütsü atema renemdar. Arrshi küm 15 nungi 18 tsüingdapurtemi vaccination centres-i oa vaccine agitsü akok mesüra CoWIN facilities ajanga online registration agitsü akok. CoWIN registrations ji January 1 nungi tenzüksü aser on-site registrations ji January 3 nungi tenzüksü. Ajisiüaka parnok nem Bharat Biotech indang Covaxin vaccine dang agütsütsü. Mongolbarnü Union Health Secretary aser state tem senden amenba mapang nung sangdong aika agütsüogo aser item rongnung arrshi küm 15-18 tsüingdapurtem atema temeja

Covid vaccination centres amenoktsü tuyuba densema lir. State tem dang tanurtem nem vaccine agütsütsüpur vaccination staffs aser officers nem training agüjang ta tuyuo. Delhi nungbo tang aliba kasa centres nung tainlonglongpurtem (15-18) nem vaccine agütsütsü. Delhi nung tainlonglongpur lakh 7-9 shi lir. Maharashtra nunga nütsüng shilem 3.7 bo arrshi küm 15-18 tsüingdapurtem lir aser iba state nunga tang amenoka aliba kasa centres nung vaccine agütsütsü. Tamil Nadu nunga tainlonglongpur lakh 33.20 shi nem vaccine agütsütsü. West Bengal nunga tainlonglongpurtem nem vaccine agütsütsü atema sorkari hospital kar shimtetsü saka nija hospital tembo meshimtsü akok. State nung school tem nung vaccine agüja liasü saka tangbo school lapoka class agidar anungji hospital tem nung ang vaccine agütsütsü.



December 30, 2021 nü Gorakhpur nung Uttar Pradesh Chief Minister, Yogi Adityanath-i Water Sports Complex semzüksüsdang tangokba noksa nung angur.



Houston nung aliba Delmar Stadium nung nüburttem COVID-19 tendangtsü asoshi atatepa aliba noksa ka yangi angur. Houston Health Department and Curative ajanga iba tesem nung COVID-19 tashidak tendangtsü asoshi amenoka liasü. Vaccine yanglua amshi tenzükür küm ka dak tali aruaka US nung tang COVID-19 cases ya anogoshi nisung 265,000 shi dak puteter.

Australia nung longkak aiteri Parliament House tejenbanung mi senloktsü

Canberra, Luchii/Dec. 30 (Agencies): Aboriginal sovereignty atema longkak aitba mapang Australia yimtiba, Canberra nung aliba parliament tejenba nung mi senloktsü, ta police temi ashi.

Old Parliament House tejaklen kishi nung mi senloktsüba nung nisung kata meyiru aser mapang tatsüka tsüingta remsepa liasü.

Iba tesem nung hopta ana longkak aita aruba sülen iba ya atalok, ta police-i ashi.

Australia nung iba ama longkak aitba ya aiben majurur, saka coronavirus tashidak wara mapang tali kumogo.

Longkak aiter kari parnok ya sorkar anemba aser "sovereign citizen" telok nung shilem ka ta par sasa jangjaogo, ta ashir.

Ato Kilonser Scott Morrison-i iba tatalokba aitsü aser "Australia nung yamai meinyaker," ta ashi.

"Iba linük nung Australia nung arua iba ama temaitsü nung mi senloktsüba yimya ngua ni süngmanger," ta pai ashi.

Brehostibarnü mi jangruba sülen iba otsü aketba ki nung inyakerkem arüsanga azüingteta liasü.

Iba ki dang ya tangbo Museum of Australian Democracy ta ajar, aser yangji lisopuri mener longkak aitba mechi December 20 nü kishi shibanga liasü.

Longkak aiter temi yimjung nung longkak aittsü temeden angateta lir, ta museum ajanga ashi. Ajisüaka Brehostibarnü longkak aitba indang kecha shia mali.

Taoba mapang parliament amshia aliba tejaklen Aboriginal Tent Embassy amenoker küm 50 ajungba mapang lisopur temi longkak aita arur.

Iba tent embassy ya longkak aitba tesem ka liasü, kong lisopur ali temeden indang ken o jembi tenzüka liasü. 1992 nungi Old Parliament House kima moapu nung teti adenshia longkak aita liasü.

Tawa iba tesem nung inyaksangshi tali akum, ta Australian Capital Territory (ACT) Police ajanga ashi.

Iba tesem nungi meta tatsüka pilar Capital Hill nung aliba ki taseni Australia indang parliament ya 1988 küm belener ao saka Old Parliament House ya museum ka ama aser national heritage site ka ama amshir.

Brehostibarnü iba lendong atalokba ya sorkar ozüing yanglur aikati aitsü aser ibai democracy anema inyakba lir, ta ashi.

"Ki ka nung mi senloktsüba ya ozüing agi mela longkak aitba ka masü, ibai mapa tamajung lir," ta deputy prime minister Barnaby Joyce-i tweet asü.

Pa jakdang deputy prime minister inyaka alisang aser tang parliament züingsem Michael McCormack-ia, "Old Parliament House nung mi jangrua lir aser longkak aiter temi "Ibai rongtokti! Ibai rongtokti! ta ayimtener. Maksü ulura. Asen democracy, asen puti otsü aser asen tashi anema inyakba lir," ta ashi.

Iba mi adokba atema bushisüingdang tenzükogo, ta ACT Police temi ashir.

France nung COVID-19 cases tali akumer

Paris, Luchii/Dec. 30 (Agencies): France nung Bodhbarnü nisung tasen 208,000 dak COVID-19 tashidak puteta liasü, koba linük asoshi aser European linüktem asoshi record tasen alitsü, ta Health Minister Olivier Veran-i ozüing yanglurtem dang ashi.

Tesüiba anogo ishika tsüingta France nung tanen makai tashidak menatepa aoba record raksajen raksar, kong Mongulbarnü cases 180,000 jangjateta Europe nung linük ka asoshi timtiba liasü, ta Covidtracker.fr ajanga ashi.

"Iba tetetzü asen linük nung anogo ka nung second shia nisung ana dak COVID-19 puteter. Iba ama tensa kodanga majangshi," ta Veran-i ashi.

Tesüiba anogo tenet tsüingta alima nung COVID-19 tashidak menatepba aoba tali akum, ta Reuters aser AFP news agency temi Bodhbarnü sayua liasü, kechiaser Omicron variant ya kanga kera prokshia aor, anungji mapa inyaker jenti kidang lidaktsür aser tashidak tendangba tesemtem sünga akumer.

Delta variant mechi France nung aliba mozüki tensa ya khuret tulu kumer liasü, aser ano Omicron yagi ano mokongshi, saka yagia kongshitsü, ta Veran-i ashi.

"Asenok asoshi tsükchir ana lir," ta pai variant tesashiba ana athishia ashi. "Omicron atema ni wave ka atema mejembitsü. Wave aika meyokteper wave

toluka arutsü," ta pai ashi. January ita tenzükba mapang tashinung France nung anogoshi COVID cases ya 250,000 dak tema alitsü, kechiaser Christmas benjong nung tenokdangba magütsüba yong tashidak tekeraba nung menatepa aor, ta minister-i Hombarnü shir liasü.

Hombarnü cabinet senden ka amenba sülen Ato Kilonser Jean Castex-i iba tashidak azüoktsü atema mera kar sangdonga liasü, saka lockdown benoktsüba mashi.

Kanga kera jajaba train tem nung achi-ajemba nokdangba mesüra café aser bar nung nokdaktsü memelaba amala tenokdangba tasen kar yimten nung danga telok temi aija liasü.

Sorkari Bodhbarnü sangdong ka nung, linük nung nightclub 1,600 shi aliba ya ano maneni hopta asem atema shibangtsü, ta metetdaktsü, koba December 6 nü shibangtsü totuyuba agüja liasü.

Interior Minister Gerald Darmanin-i nüburttem dang New Year mapang lokti ajema adenshitsu, kima face mask inoker senzütsü aser aonung telok nung yi majemtsü ashi.

France nung anogoshi COVID tashidak agi menerper kangshia mozü kidangi nisung 1,000 shi arur, saka ibai 2020 küm April ita wave mezüingbuba aser November ita wave tanabuba aruba mapang dang nungibo tajemba lir.

Gulf leni bener oyaa aliba amphetamine mozü million 9 apu

Beirut, Luchii/Dec. 30 (Agencies): Gulf nung tenüing shia maliba linük kati ozüing alema amphetamine Captagon mozü süngjang million tuko bener aotsü merangba Lebanese security agency temi raksatsü, ta ketdangsurtemi ashi.

Lebanese Customs ajanga Bodhbarnü sangdong ka nung ashiba agi, parnoki iba dak sendakba nung nisung kar pua lir aser Beirut rongnendak

plastic agi yangluba jemben (orange) nung inoka aliba mozü ya Lebanon nungi bener aotsü merangba mapang ketdangsurtemi ngutetba sülen bushisüingdang tenzükogo.

Mapang tatsüka lir rongnenkdak nungi Interior Minister Bassam Mawlawi-i ashiba agi, nisung pua alirtem indang tejangja aser iba operation indang tang tashinung meteta aliba meshitetsü.

(Maneni tapak 9 nung...)

Sudan nung UN chiyongtsü ayuba tesem nung auya

El Fasher, Luchii/Dec. 30 (Agencies): Sudan indang North Darfur state nung World Food Programme (WFP) warehouse aser taoba mapang peace keeping mission temi amshiba tesem ka nung mejangjaba nisungtem prangbong amer arua auyaba sülen ketdangsurtemi aonung curfew alitsü sangdongogo.

Bodhbarnü sangdong ka nung, tajemzükba jenjang nung aliba nisung 730,000 shi ita ka mesütsü atema yimtiba, El Fasher nung yua aliba chiyongtsü tonne 1,700 dak tema yakonung auya, ta United Nations ajanga ashi.

Iba tesem anasa khatempa liasü, ta yangji alirtemi SUNA news agency dang ashi.

"Sudan nung nisung asem

nungi nisung ka teyari nüngdaka lir. Iba ama mapa tamajung inyakba ajanga teyari nüngdaka aliba nüburttem nem teyari agütsütsü tashi kanga mejungi ajemtsür," ta UN humanitarian coordinator Khardiata Lo N'diaye-i ashi.

"Sudan tesem ajungalen iba amala tesemtem wazüka aser kumzüka ayutsü atema Sudan sorkar dang ajungshir," ta lai ashi. Twitter nung Darfur Governor Mini Minawi-ia iba mapa ya aitsü aser aibelener merenshitsu, ta ashi.

UN Secretary-General Antonio Guterres-ia iba auyaba ya aitsüogo.

"Tepetzük jenjang nung aliba nisung 730,000 shi ita ka mesütsü yua aliba chiyongtsü metric tons 1,900 (1,700 tonnes)

ayuaogo," ta Guterres indang odongtar kari Bodhbarnü sangdong ka ajanga ashi.

"Item chiyongtsü ya civilian tem amshitsu atema Sudan ketdangsur nem agütsür liasü," ta pa indang odongtar Stephane Dujarric-i ashi.

Guterres-i Sudan sorkar dang tensa azüoktsü aser El Fasher nung anünga aliba United Nations operation junga inyaktetsüsa yariteptsü ajungshia liasü.

Taoba küm December ita UN aser African Union lungjemer aliba mission, UNAMID anizükür aoba ajanga iba linük nung küm 13 tashi peacekeeping operations tembanga liasü, saka Sudan nüburttemi amshitsu asoshi hadir aser oset aika auyaba tesem

nung liasü, ta Guterres-i ashi.

Tesüiba küm Darfur nung azüoktsü tali akumba ajanga nisung jenti pei ki yutsür ao, aser 2020 küm tatemlen telungpur telok balala den yimjung tezüingzüktep agiba sülen telok balala raraba ajanga tensa tamajungba akumer aser ano anasa aliba Libya nungia telungpur arur, ta ashir.

Iba region nungya shiruru metsür aser aluyimer tsüingta ali, kiset shiruru, tzü aser shiruru chiyimtsü tesemtem agi raktepa October ita nungi rarayonga arudang nisung 250 shi tepsetogo.

Nisung meyerijang aika pei ki yutsür jena aotsüsa akum, ta International Organization for Migration (IOM) ajanga ashi.

Mitkar tanishir General

Abdel Fattah al-Burhan-i October 25 nü tashiyim amshia sorkar atsüingdokba sülen Sudan nung yimtenren tsütsü mepetmesü adoker lia azüoktsü aser lendong balala ajurur.

Taruba küm tashinung Sudan nung million 14 dak tema teyari nüngdaka akumtsü, ta UN Office for the Coordination of Humanitarian Affairs ajanga ashir.

2003 küm nungi tenzüka Darfur nung armed operation ka samatsütsü nükjidong nung mitkar aser parnok den sendaktepa aliba militia temi ayamesoba mapang tesem balala nung jenoka alir ya aika pei ki yutsür aotsüsa akum aser iba rara nung nisung 300,000 shi asü, ta asadangteta lir.



ASOBA 1923 - ASÜBA 17.12.2021

Onoki teti meima aliba ojala **Moakala Ozükum** (Waromung) Akümüli toktür aoba mapang, onok mangyim jashi nung alidang, Arogo lokti tentet balala, kiyonger aser kija kibong kwikati onok den nübo, rongsen aser sarasadem agi onok yariogo nenok ajak dangi ozüi pelaba lemsatebper.

Asen teyanglur Tsüngremi nenok mapa tajung maneni moajangma.

Temeim Chirurtem, Semchirtem aser Anükapang.

Khar Kaketshir Telongjem Platinum Jubilee amung



Khar Kaketshir Telongjem Platinum Jubilee shibangba sentong nung National Highways, Treasuries & Accounts, Govt. of Nagaland, Advisor, Dr. Longrineken-i jembiba noksa nung angur.



KKT Platinum Jubilee indang tanabuba session nung tetushi tesemdang, Higher Education, Technical Education and Tribal Affairs Minister, Temjen Imna Along-i jembiba noksa nung angur.

Dimapur, Luchii/Dec. 30 (TYO): December 28 aser 29, 2021 nü "Ningjang Tasenleni" (Towards New Horizons) omen nung ajemdaker Khar Kaketshir Telongjem (Khar Students Union) pur 75buba Platinum Jubilee mungogo.

Iba Jubilee lapokba sentong nung Education Department, Govt. of Bihar, Secretary, Asangba Chuba Ao IAS aden. Iba sentong mezüing session nung o jembir Officer on Special Duty (Finance) Govt. of Nagaland, Taliremba-i 'Ongdang Latep' (Bridging the Chasm) onük nung ajemdaker jembio. Pei tetsü oshi indang tongtibang aser pei sobaliba aser maitsü wazüka ayutsü indang nung pai jembir. Alakteta tejaoker, Tribal Affairs and Higher Education, Govt. of Nagaland, Minister Temjen Imna Along-i, tajungshiba olen

balala lemsatepa telok ayongzük. Along-i, pei sasa pei sempet/inyakyim angatettsüla aser nukjidong nung rangloker inyaktüsü, ta ashi. Naga nungeri alima dang pei sempet aser tasa sayatsü asoshi inyaktüsü, ta pai shisem.

Tanabuba session nung tongti o jembir Gauhati High Court Kohima Bench: Kohima, Nagaland, Senior Advocate, C.T. Jamir-i 'Ningjang Tasenleni' (Towards New Horizons) onük nung ajemdaker jembir. Rev. T. Alemla Walling-i 'Nuchiba Shisashir' (Towards New Horizons) onük nung ajemdaker kaketshirtem ajungshia liasü. Iba session shibangba sentong nung National Highways, Treasuries & Accounts, Govt. of Nagaland, Advisor, Dr. Longrineken dena liasü.

Gulf leni bener oyaa aliba amphetamine...

Ajisiaka bushisüngdangba mapang mozü ya kong yanglua aseper shibai süngjang-lijang abendak miima yua liasü, itemji metettsü, ta pai ashi.

"Ozüng alema Captagon shibelenba anema Lebanon ketdangsurtemi temolung agütsür rarar ta asen nübur aser tembar linüktem, talisa Gulf linüktem dang nangzükter," ta pai ashi.

Captagon ya Kuwait lenir aorba liasü, ta iba ken o meteta aliba osang ka ajanga ashi.

Lebanon ya Saudi Arabia, United Arab Emirates, Bahrain aser Kuwait den mepetmesü adoka aliba bentettsü merangba

mapang ka nung iba mozü ya apur.

Jeddah rongnendak pomegranates bena aliba rong ka nung Captagon süngjang million 5.3 shibelentsü merangba nokdang ta ketdangsurtemi ashiba sülen taoba küm April ita Saudi Arabia-i Lebanon nungi adokba agricultural product tem ajunga nokdang, ta sangdonga liasü.

Captagon ya Lebanon, Jordan aser Syria nung yanglur aser aiben Saudi Arabia aser danga Gulf linüktemi bener aor.

Lebanon aser Syria nungi bener aruba Captagon pills million aika aliba rong jenti


Sangküm January nung Bro Daddy sayatsü

Mumbai, Luchii/December 30, 2021 (Agencies): Superstar Mohanlal-i tongti shilem agiba film - Bro Daddy indang mezüing poster sayaogo. Director Prithviraj Sukumaran-i Instagram sabang nung iba poster lemsatep. Mohanlal-ia social media sabang nung iba film indang poster lemsatepa liasü.

Antony Perumbavoor aser Aashirvad Cinemas longjemer sayatsü aliba film nung Mohanlal den Prithviraj Sukumaran, Meena, Kalyani Priyadarshan, Unni Mukundan, Lalu Alex, Murali Gopy, Kaniha aser Soubin Shahir nungeri tongti shilem agiogo. Iba film atema Deepak Dev-i background music yanglutsüogo.

Taküm July ita Bro Daddy film ya Hyderabad aser Telangana nung tangok tenzük. Cinematography tsütsü Abinandhan Ramanujam-i yariogo. Mohanlal indang taruba film ya January 26, 2022 nü OTT sabang nung sayatsü.

Bro Daddy dak alaka, Mohanlal-isa 'Aaraattu' nung shilem agiba angutsü. Iba action drama ya B. Unnikrishnan-i direct süogo



aser cast rongnung Shraddha Srinath, Ramachandra Raju, Nedumudi Venu, Siddique, Prabhakar, Vijayaraghavan, Saikumar, Indrans, Malavika Menon, Swastika aser Rachana Narayanankutty nunger dena lir. Bro Daddy sayar sülen anogo ishika lir February 10, 2022 nü theatre nung Aaraattu sayatsü.

Tawa, Mohanlal-i film

yanglur Vysakh den külemi project ka renemba sangdongogo. Project tasenba nungja 'Monster' asütsü. Iba film atema Antony Perumbavoor-i senotsü tsütsü yariogo. Kasa mapang Mohanlal-i P. Anil indang 'Bharath Rathna' nunga shilem agitsü terenemba lir. Monster film ya March 05, 2022 nü sayatsü.

Nora Fatehi dak Covid-19 putet

Mumbai, Luchii/December 30, 2021 (Agencies): Actress Nora Fatehi dak Covid-19 putet. Social media sabang nung Nora-i iba osang lemsatepa liasü.

"Covid-19 wara agi shirangdar. Tesüiba anogo ishika nungi yipden nungi mesaktetti kanga mejungi shirangdar. Nenok dang kümdanga alitsü aser teti tejak nembangba mask inoktsü asoshi mepishir. Iba wara kanga sashia prokdar aser nisung mashi ka dak iba tashidak menatsü akok," ta Instagram nung Nora-i lemsatep.

"Iba tashidak agi kanga mejungi shirangdar; nisung mashi ka dak iba tashidak menatsü akok anungji ajak



kümdanga alitsü asoshi mepishir. Iba wara nungi yakta taneptsü angutsü asoshi anepaludar. Temang anema alibaji ajak dang tongtibangtiba," ta lai shisem.

"December 28 nü Nora Fatehi dak Covid-19 positive putet. Covid-19 protocol nung anidaka, doctor tetuyuba nung Nora quarantine südar aser tekümdangtsü meratem agitsü asoshi BMC den longjemer inyakdar," ta Nora indang team nungi otongdar kati ashi.

Kasa anogo actress Shilpa Shirodkar-i la dak Covid-19 putetba osang lemsatep. Shilpa-i "Hum", "Khuda Gawah" aser "Aankhen" nung tongti shilem agiba ajaki jangjaa lir.

1990s mapang Shilpa ya nungtugu actress ka liasü aser tesüiba anogo pezü tejakdang la dak iba tashidak putet. COVID-19 vaccine agir Indian celebrity rongnung la mezüing asütsü. Shirodkar, shiba Dubai nung lar kibong den külemi alir, taküm küm tetenzüklen January ita lai Sinopharm vaccine agia liasü.

"Ajaki tekümdangtsü meratem nung anidakang; vaccine agiang aser temzüing nung anidakang. Iba wara nungi nübur kümzüka ayutsü asoshi sorkari tajungtiba inyaker," ta lai lemsatep.

Nora aser Shilpa dak alaka, Bollywood nung tongtibang nisung kar dak Covid-19 puteta lir. Arjun Kapoor, Anshula Kapoor, Rhea Kapoor aser Karan Boolani nungeri dak iba tashidak puteta lir. Tawa, Arjun aser Anshula naprongla Bikaner, Rajasthan nung munga liasü aser pei talidaki shilangba mapang tenaprongla dak Covid-19 putet.

(Tapak 8 nungi...)

sasa rarar, ta shia liasü.

Iba video temai adokba sülen Saudi Arabia, UAE, Kuwait aser Bahrain linüktemi Beirut nungi par envoy tem jatet aser Yemen-ia kasaji inyaka Lebanese ambassador tem meindok.

Bahrain aser UAE ajanga par senso dang Lebanon yutsütsü sangdonga liasü.

Saudi Arabia-i Lebanon nungi oset kecha bener marutsü tenokdangba agütsü.

Iba mepetmesü angatetteptsü mechi Kordahi ya information minister ka ama December ita mapa nungi anena liasü.

10th Imsütemjen Memorial TT asayamung takok manung asayaogo



Takok angurtem den match officials aser tayongertem.

Mokokchung, Luchii/ December 30, 2021 (TYO):

10th Imsütemjen Memorial Table Tennis Tournament Dec 27 nungi 29 anogo asem nü Ungma yimdak Langpang Lenden nung ayongzüka liogo. Iba asayamung ya Longtrok Senden Ungma-i ayongzüka akar.

Taküm iba asayamung MARCOFED (Govt. of Nagaland) Chairman, Dr. M. Chuba Ao-i meraketa tenzüksü aser yimsüsür Wb. Imtodongba Jamir Tatar-i sentong tobur junga agia shibangtsü.

Asaya telemsa balala nung takokertem yamai:

- Men's Open Singles

Champion: Dijanglong Kamson, Dimpur

- Men's Open Singles Runners-up: Seyivilie Seyie, Kohima

- Men's Open Doubles Champion: Dijanglong Kamson Dimpur & Meyinukshi Longkumer Kohima

- Men's Open Doubles: Runners Up: Seyivilie Seyie & Kevirielle Dziivichii, Kohima

- Veterans 40+ Champions: Kevikrielle, Kohima

- Veterans 40+ Runners Up: M. Wati, Mokokchung

- Under-15 Doubles Champion: Imkongwati,

Ungma & David Hinglak, Dimpur

- Under-15 Doubles: Runners Up: Kesinuo & Vilavotuo, Kohima

- Under-15 Singles: Champion: David Hinglak, Dimpur

- Under-15 Singles, Runners-up: Lijempong, Mokokchung

- Junior Team, Champion: Team B, Ungma

- Junior Singles, Champion: Korongshin, Ungma.

- Junior Singles, Runners-Up: Imtisupong, Ungma

- Youngest player of the Tournament: Jititen Longkumer

Ross Taylor international cricket nungi anentsü



ajak tatembang kati arur aser tangba mapang ya asaya nungi anentsü mapang tetemjen ta kü mulung nung tejembiba ka aiter," ta Taylor-i lemsatet.

Taküm, Southampton kübok India aser New Zealand na World Test Championship asaya mapang Taylor-i tatem tashi asaya team puri takok angu, saka India nung Test asayadang pai junga shilem magitet aser innings pezü nung pai run 11 dak tema meyanglutet.

Bangladesh series ya Mount Maunganui nung New Year's Day anogomung nung tenzüksü.

"Batter/Batsman ka ama pai tasa aser sempet tajung amshia temaba jenjang tongteta asayaogo. Iba ama jenjang tongteta asayaba ya küm talangka asayar takotet ka ama pai shilem agiba kuli sayur," ta Coach Gary Stead-i ashi.

"Küm aika pai ajangshia aruba ajanga asayamung balala nung külem team pur kanga yariogo aser record balala ajanga pa sempet ajungba tali jangjar. Iba wadang nungi pa anenaka, onoki pa kanga menungratsü," ta Gary-i shisem.

Domestic cricket nung telemtetba ka magidang season tatem tashi Taylor-i Central Districts atema maneni asayatsü.

Luchii/December 30, 2021

(Agencies): Sangküm February aser March ita Bangladesh den Test series ana aser Australia o Netherlands den ODI asayar sülen International cricket nungi anentsü, ta New Zealand batter takotet Ross Taylor-i metetdaksü.

2007 küm Test cricket nung ajemoker külen nungi 'Black Caps' nung Taylor ya tongti asayar ka ama shilem agia arudar, kong New Zealand Test cricket nung otsüsüsüsa asaya 110 nung pai run 7,584 (average 44.87) yanglua lir.

Test 100 asayar New Zealand nung rongnung Taylor pezübuba lir aser One Day International nunga pai run

8,581 aser century 21 yangluogo. Iba den külemi cricket format ajunga nunga match 100 tashi asayar rongnung pa mezüing liasü.

"Iba wadang nung ajemoker külen nungi jangratema asaya aruogo aser linük tenüing nungi shilem agitsü maongka anguba ya tia taka ama bilemer," ta taoba mapang captain Taylor-i ashi.

"Külem team pur den asaya aser tanga team nungi asayar mongin/takotet kar den tokteptsü maongka tulu anguba asoshi pelar aser asayamung balala nung shilem agia arudang aika den tembar tajung yimtetogo aser ni ajangshia arubatem kü mulung nung teti alitsü. Ajisüaka, kechisarena

ICC Men's ODI Player of the Year Award atema asayar pezü nominate süogo

New Delhi, Luchii/ December 30, 2021

(Agencies): International Cricket Council ajanga Men's ODI Player of the Year Award

Babar-i iba award ngura, Mohammad Yousuf (Men's Test Player in 2007) aser Hasan Ali (Men's T20I Player in 2017) sülen Pakistan nung rongnung ODI naroküm angur rongnung mezüing aser asayar tasembuba akümtsü.

Babar aser Hasan na den 'Men's ODI Player of the Year Award' atema South Africa nung Janneman Malan aser Ireland nung Paul Stirling nati tokteptsü.

Taküm Babar Azam-i ODIs trok dang asaya, saka series ana nung pai Pakistan team atema shilem tulu agia liasü.

Taküm Pakistan-i South Africa madak 2-1 agi series akokba mapang run timba yanglur rongnung Babar (228) tanabuba liasü aser asaya anaprongla nung pai 'Player of the Match' award angu.

Mezüing ODI nung Pakistan-i run 274 (target) tongtettsü asoshi Babar-i century yanglua liasü aser iba series final nung pai ball 82 nung run 94 bendenloktsü aser team-i run 320 yanglutet.

England team-i Pakistan madak 3-0 agi takok anguba

mapang, team nungi tangar dak alakteta Babar-i junga asaya. Match asem nung pai run 177 yanglutet.

Küm ana tashi cricket nungi nokdanga arur sülen taküm Shakib Al Hasan-i tanaben ODIs asaya liasü. January nung Bangladesh aser West Indies na asaya aser pai Shakib-i 'Player of the Series' angu. 2019 küm July ita Shakib-i tesüsa ODIs asaya liasü aser taküm Bangladesh-i West Indies madak 3-0 agi series akokba mapang pai run 113 yanglutet aser wicket 6 agi.

Ajisüaka, Sri Lanka aser Bangladesh asayaba mapang, match asem nung Shakib-i run 19 dang yanglu aser wicket 3 agi.

Maneni, taküm ODIs nung Ireland nung Paul Sterling-i run 705 yanglutet, koba taküm küm ODI asayamung nung run timtiba yanglur rongnung pa asütsü.

*** ICC MEN'S ODI PLAYER OF 2021 NOMINEES**

Babar Azam, Janneman Malan, Shakib Al Hasan, Paul Stirling

*** ICC MEN'S T20I PLAYER OF 2021 NOMINEES**

Jos Buttler, Wanidu Hasaranga, Mitchell Marsh, Mohammad Rizwan

*** ICC MEN'S TEST PLAYER OF 2021 NOMINEES**

Joe Root, R Ashwin, Dimuth Karunaratne, Kyle Jamieson

Australian Open nung Dominic Thiem masayatsü

Melbourne, Luchii/ December 30, 2021

(Agencies): Mapang talangka nungi tekanük nung timtem aliba ajanga taruba ita Australian Open asayamung nung shilem magitettsü, ta taoba mapang world no. 3 Dominic Thiem-i ashi.

Arishi küm 28 tain Austria nung Dominic, shiba June ita Mallorca Open nung tekanük yirur külen nungi asayamung ka nung dang shilem magi, pai taküm US Open title tanaben takok angutsü asoshi masayatet.

Thiem, shiba ranking nung jenjang 15buba tashi luogo, Flushing Meadows nung pa mezüing major title takok mangudang, pai taoba küm Melbourne Park asayamung final tongtetta asayaogo.

Sangküm January ita tatemlen South America nung Cordoba Open (Argentina) nung Thiem-i 2022 season tenzüksü tebilemba lir.

"Australia nung fans den ajuruteptsü maongka mangutsü, saka 2023 küm iba asayamung (Australian Open) nung shilem agitsü," ta Twitter nung Thiem-i lemsatet.

"Tetoktepba asayamung nung tanaben tajungba asayatsü asoshi iba telemtetba (2022 Australian Open nung shilem magitsü) ya shitak agir ama onoki bilemer. Tang ni tangaleni aotsü sentong kecha mali aser Austria nung anogo ishika amungtsü aser iba sülen taruba season mezüing asayamung (Cordoba Open) atema practice agi tenzüksü tebilemba lir," ta Thiem-i ashi.

BILEMDANGANG

"Shisatsü memerükeri tangari inyakba nung kodanga temulung malemer."